



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 6

Yangia anidakangma :



Tir Yimyim



tir_yimyim



tir yimyim

TAPAK 8

Zubeen asüba ken o: Assam
Police Singapore-i maotsü

France PM Sébastien Lecornu ita ka
majungdang mapa nungi anenogo



VOL. XXII ISSUE NO. 352 (ADOK 352) DIMAPUR SANGTENNÜ (TUESDAY) MONGPUTENI (OCTOBER) 07, 2025 ₹ 5.00

CANSSEA-i asemnü 'pen down strike' alitsü sangdong

Dimapur, Rongjui/Sept. 06 (TYO): Confederation of All Nagaland State Services Employees' Association (CANSSEA) ajanga Nagaland nung aliba sorkar office ajunga nung October 14, 2025 nü nungi tenzüka anogo asem 'pen down strike' alitsü sangdongogo.

Indian Administrative Service (IAS) nung anioktsü atema shimteta aliba Non-State Civil Service (Non-SCS) officers list nungi "non-NPSC candidate" agienang ta akhangba nung state sorkar ola madokba aser temulung agütsüba yimya mesayuba ajanga iba telemtetba ya agi, ta association sangdong ajanga ashi.

Temsüa aliba nübu shimtsü aiben mepishiaka sorkari senzüka yuja arur ta ashi.

September 25, 2025 nü renemba select list nung "non-NPSC candidate" inoksemba

ajanga nübu shimba yimya nung shidak meinyakba sayur, ta association ajanga ashi.

"Tetemsü aser tejangja nübu shimtsü sorkar dak nungi imlar, saka sorkari linük nung IAS ama tematiba mapa nung backdoor yimya nung ketdangsür shimoktsü ang tejangraba ajiteter," ta sangdong ajanga ashi.

Parnoki sorkar dang IAS nung anioktsü asoshi Non-SCS officers shima aliba nungi non-NPSC candidates tem agientsüla aser merit nung ajemdaker tarutsü nung ochishia shimtsü asoshi March 10, 2025 nü sangdongba Vacancy Circular mapa kuma inyaktsü akhanger.

Ribbons mesüra badges tanak inokba aser poster campaigns densema taoba mapang longkak aitba yimya den külemi pen down strike ya alitsü, ta CANSSEA ajanga metetdaksü.

Pfutsero-Phek lenmang yanglushitsü CCPO-i anogo züngzüktsü

Dimapur, Mongputeni/Oct. 06 (TYO): Phek district kübok Sakraba jila nung headquarter amenoka aliba Centre Chakhesang Public Organisation (CCPO) ajanga Phek indang Deputy Commissioner dang Sakraba EAC headquarters ajanga aoba Pfutsero-Phek two lane lenmang tekeraba nung yanglushitsü anogo züngzüktsü.

DC dangi züluba shiti nung iba lenmang ya KKB Company ajanga anepalutsüba sernung senzüka yutsür, ta ashi aser ketdangsür temi October 31, 2025 tashinung iba lenmang yanglushitsü asoshi mera magira telangzüba tesashi agütsütsü ta ashi.

Iba lenmang ya sorkari senotsü teyari agüja yanglu, saka alinen aluba, retaining walls laoba, lenmang atsüoka aiba aser junga meyagluba yong tamajungba dang akumer, ta ashi.

Küm pezü nungi pongu tahsi lenmang anepalutsü sen liaka, nüngdakba mapang latetja aliba

lenmang nung machinery kata meyok, ta CCPO ajanga ashi.

Retaining aser protection walls laor aliba yanglushitsü, lenmang shilem kar atsüoka aiba akhi ama kumdaktsütsü, raksar aliba tesem technical yimya shidak amshia yanglutsü, potholes aser kaksar aliba lenmang yanglutsü CCPO ajanga ketdangsür aser contractor dang ashi.

Parnokisa alinen alua aliba aser kilentzü aoba lenmangtem müreksü, Zero Point 00km to 20km Pfutsero-Phek road via Sakraba, Porba, Pholami aser Khomi nung arem adoka aliba müreksü ashi.

Taoba mapang yanglushiba mapa nung temulung masür aser iba mapang tapok atepba tesem karbo shizüka ogo, ta CCPO ajanga ashi.

Contractor temi temulung magütsüba asoshi mepelaba lemsatapa CCPO ajanga district administration dang iba ken o tim ketdangsür dangi bena PMU senden nung jembitsü ayongzük.

ECI-i States/UTs 7 nung bypolls agitsü sangdong

New Delhi, Mongputeni/Oct. 06 (Agencies): Hombarnü Election Commission of India ajanga states aser Union Territories nung bypolls agitsü anogo sangdongogo.

Menden ti atema polling ya November 11, 2025 nung agitsü aser November 14, 2025 nü results sangdongtsü.

November 11 nü bypolls agitsü aliba menden ya Jammu and Kashmir nung Budgam aser Nagrota, Rajasthan nung Anta, Jharkhand nung Ghatsila, Telangana nung Jubilee Hills, Punjab nung Tarn Taran, Mizoram nung Dampa aser Odisha nung Nuapada alitsü.

Dy. CM, Y. Patton-i Swadeshi drive alitsü ayongzük



Kohima, Mongputeni/Oct. 06 (TYO): Hombarnü Nagaland Deputy Chief Minister Yanthungo Patton-i nüburtem dang Atmanirbhar Bharat indang tamendak dak ama Swadeshi agizüktsü ayongzük aser ibai linük tashi indang movement ka lir, koba ajanga India nunger ajunga linük sobaliba, rongsenketzüng aser senmangren balala den sendakteptsür ta ashi.

Tang telidak Atmanirbhar Bharat: Swadeshi Sankalp Campaign nung shilem ka ama Kohima nung osangbener senden ka nung jembidang, Swadeshi yimya amshitsü züngzüktepba ya yimyim ka kisüng masü saka pei sasa pei peria aliba India lima kumdaktsütsü tanüla lir, ta Patton-i ashi.

"Har Ghar Swadeshi, Ghar-Ghar Swadeshi ya asenoki teti jembiba olen aser asen mission kumdaktsütsüla. Asenoki Swadeshi shimdang, asenoki asen li, asen nübur tushir aser tashi tait aser pei peria aliba India linük ka yangertsü asoshi tongtipang mera agir," ta pai ashi.

Swadeshi tanüla agi India

nüchiso asoshi Lokmanya Tilak, Sri Aurobindo, aser Mahatma Gandhi ama lenir nokdakba movement len ania arur 1964 nung Dattopant Thengadi-i asendenshitsü, shibai rongsenketzüng tsütsü pei peria aliba ya chichiba national security lir ta ashi.

Iba yagi Atmanirbhar Bharat mangdang ajungmesoa Ato Kilonser Narendra Modi lenisüba kübok asendenshir tejakleni bener aor, ta Patton-i ashi.

Dangar dak memetaloki alitsü indang jembidang Swadeshi (India nung osettsüset yanglua amshiba), Swabhasha (India nunger oshioben aser shisatsü temaba jenjangi ajungketba), aser Swabhusha ((heritage, design, aser aesthetics) ya Viksit Bharat yangertsü asoshi tashi ka lir, ta pai ashi.

Paisa Make in India, Startup India, ODOP, digital infrastructure aser defence tsütsü linük nung yanglutetba hadir amala rasaa ashi.

Tangbo Swadeshi ya khadi aser handicrafts kisüng masü saka defence, semiconductors, renewable energy aser digital

technology tashinung lir, ta pai ashi.

COVID-19 mapang India-i kanga keraa pei linük nung PPE kits aser ventilators yangluba, Vaccine Maitri programme aser tang tesüsa Tejas LCA fighter jet aser BrahMos missile exports densema defence tsütsü takok anguba indanga lemsatapa liasü.

"India ya alima nung mobile timtiba yangluba jenjang tanabuba nung lir aser UPI ya alimai kanga junger ta agizüker," ta Dy. CM Patton-i ashi.

Pai shishilempar aser nüburtem dang India nung yangluba osettsüset amshitsü ayongzüka liasü.

"Dokan shia nung 'Garv se Kaho Ye Swadeshi Hai' ta zülur ayutsüla. Asen linük nung sen ali tashi, ibaji ajanga asen lenmang yanglur, scheme balala atema sen agütsür aser employment adokdaksür," ta pai ashi.

Swadeshi Sankalp campaign nung shilem ka ama quiz competitions, essay contests, seminars, trade conferences, aser Swadeshi fairs linük tesem ajunga nung ayongzüktsü, ta Patton-i metetdaksü.

Civil Defence atema kongsang balala senden aser workshop ayongzük

Dimapur, Mongputeni/Oct. 06 (TYO): Taküm April ita Pahalgam nung kiralongrar temi amakba aser India-i Operation Sindoor ajanga telangzüba tesashi agütsüba sülen Ministry of Home Affairs (MHA), Government of India ajanga States aser Union Territories ajunga dang Civil Defence indang Coordination Meeting-cum-Workshop ayongzüka agitsü totuyuba agüja liasü.

Iba totuyuba nung district level nung tashi itshitsü atema Deputy Commissioners (Controllers of Civil Defence) aser District Commandants of Home Guards (Dy. Controllers of Civil Defence) shilem agitsü shia lir.

Iba totuyuba nung ajemdaker Directorate of Home Guards, Civil Defence aser State Disaster Response Force, Nagaland ajanga parnok indang Headquarters, Kohima nung October 4, 2025 nü sentong ayongzüka liasü.

Renchamo P. Kikon, IPS, Director General Home Guards, Civil Defence and SDRF ajanga iba sentong ayongzükba nükjidong rateta jembiba mapang, iba lendong atalokba sülen subcontinent nung litsü-lika nung ajemdaker yimten yimsüsüba yimya melenshiba ajanga linük tesem ajunga nung Civil Defence volunteers ayongdena tashi itshitsü nüngdaka akum, ta ashi.

Iba yongji Government of India, Ministry of Home Affairs ajanga "Scheme for Training and Capacity Building of Civil Defence" ya apitet, koba March 31, 2026 nungi mapa kuma amshitsü, ta pai metetdaksü.

Iba sentong nung shilem ka ama Directorate General, Fire Service, Civil Defence and Home Guards, MHA, Government of India aser Directorate of Home Guards, Civil Defence and SDRF, Nagaland tsüngta MoU ka

June 9, 2025 nung zülutep.

Iba MoU kübok Nagaland nem Central Training Institute, Toluvi, Dimapur nung Master Trainers nisung 20 nem training agütsütsü aser Civil Defence Districts ter - Kohima, Dimapur, Mokokchung, Wokha, Zunheboto, Phek, Tuensang, Mon, Kiphire aser Peren nung Civil Defence Wardens aser Volunteers 3600 nem training agütsütsü nungloktsü.

Sentong nung Medozhalie Pienyu, Deputy Commandant General ajanga Civil Defence Organisation nung Warden Service indang tongti shilem rateta ashi aser Deputy Commissioners aser district ketdangsürtem dang Civil Defence Wardens ama nisung jangjateta shimtsü ayongzük, kechiaser parnok ya ajungben lendong timtem mapang sorkar aser nüburtem tsüngta tongtipang tesendaktep ka ama alitsü, ta ashi.

WENN Bazaar 2025 takok ngua tembangogo



Dimapur, Mongputeni/October 6 (TYO): 4buba WENN Bazaar October 4 nü CT Square, Chumoukedima nung kanga takok ngua tembangogo. Taküm iba sentong ya "Creating a Sustainable Networking Space for Women Entrepreneurs" omen nung ajemdaker agia liasü.

Sentong ya October 2 nü tenzüker aser 4 nü tashi agiogo, kong Nagaland kübok tetsüri aniba enterprise 111-i shilem agi aser iba ajanga tesemdanger 10,000 dak tema atsüa arua liasü. Iba sentong ajanga sen lakh 70 aazükogo, koba imlaba dang nungi timba liasü aser iba ajanga tetsürtem rongsenketzüng nung tashi ita aoba dak sendakba nung alizüing tasen ka tongtadaktüsügo.

WENN Bazaar ya tetsürtem nem rongsenketzüng nung tashi

agütsütsü, shishilembaba nung inyakyimtajungba kümdaktsütsü, maneni angazüktsü aser purapiteta aotsü ajungmesotsü, kati ka den tesendaktep yanglutsü aser lisopurtem sempet aser sangrasangji benjungtsü nükjidong nung Women Entrepreneurs Network Nagaland (WENN)-i ayongzüka kümshia agia arudar.

Iba sentong ya nükjidong tongteta agia, sentong nung shilem agirtem ajangzüker aser state rongsenketzüng renlokba nunga teyari agütsüogo. Iba bazar yagi tetsür entrepreneur tem ajanga nisung 405 dak tema employment nongitogo aser tetsüri aniba brand 111 nem maongka agütsüogo.

Shishilembaba dak alaka WENN Bazaar 2025 mapang entrepreneurial onük balala nung

hands-on workshop tenet agi, Department of Industries and Commerce kübok RAMP den longjemer FSSAI aser Udyam nung züngoksemtsü, Kats Collection-i bridal fashion show ka saya, St. Joseph University, Chumoukedima kaketshirtemi flash mob performance ka süa liasü.

Department of Industries and Commerce, Toyota, North Eastern Development Finance Corporation Ltd. (NEDFi), Indian Oil Corporation, Department of Women Resource Development, CT Square (Venue Partner), State Institute of Hotel Management (SIHM) (Hospitality Partner), Synergy Group Enterprise (Production Partner) nungeri teyari agütsüba ajanga iba sentong takok ngua agitetogo.

Chumoukedima district atema angati skill training agütsütsü

Dimapur, Mongputeni/October 10 (TYO): Nagaland Skill and Entrepreneurship Development (NSED), IDAN, Government of Nagaland-i sponsor süa October 7 nungi ICFAI University, Chumoukedima anasa 6th mile Sovima nung angati Skill Training agütsü.

Ib training ya

Chumoukedima District atema dang asütsü. Angati Skill Training ya, Electrician Cum Plumbing, Masonry Cum Tiling (Construction) atema asütsü. Training ya ita ka agitsü aser training nung shilem agitsüpurtem ya class 5 pass sür alir aser temapurtem asütsüla.

Angati training den külemi training nung shilem agirtem

tanendak aser achi ajemtsü angati agütsütsü. Training tembangba sülen trainee tem nem kuli kaket kaka agütsütsü.

Training ya anepdang 8 ako nung tenzüker aser 4 ako nung tembangtsü. Osang tejangjaba agitsü atema item number; 9863217029/ 7005176609 aser www.pinnacleskills.in ajanga tongteprateptsü metetdaktüsügo.

Weaving Heritage seminar shilem pezübuba agiogo



Weaving Heritage dak sendakba nung seminar shilem pezübuba Molvom yimtsüing nung agiogo.

Dimapur, Mongputeni/October 6 (TYO): "Weaving Heritage: Propagating Sustainable Community Life in Harmonious Co-existence with Nature through the Cultural and Traditional Ethos and Values of the Tribal Kukis in Nagaland" ta nüngja agütsür agiba seminar shilem pezübuba October 4 nü Medziphema Sub-division nung Molvom yimtsüing kübok KCC N/S, Conference Hall nung agiogo.

Iba seminar ya North Eastern Council (NEC), Ministry of DONER, Government of India-i sponsor asü aser Gracious Society, Ahthibung, Kuki Students'

Organisation, Nagaland (KSON) aser Kuki Inpi Nagaland (KIN) nunger longjemer ayongzüka liasü.

Sentong ya KIN tir L. Singsit, IPS (Retd.)-i lapoktsü. Sentong nung o jembiba mapang pai, lanurtemi pei sobaliba mesentoktsü aser kasa mapang nung khuret angateta alima temelenshi den sütepa aintsü nüngdakba lemsatepba liasü. Paisa, Kuki nunger sobaliba ya lokti-i tüzümpung, arem shiruru aser süngtolitong akümtsübuba aser longjemer libaliroba dak tera yangloka lir ta ashi.

Sentong nung shisalen sayurji Chairman, Custom &

Culture Board, Kuki Inpi Nagaland (KIN) Lensei Lotjem, Assistant Professor, Burdwan University West Bengal David Hanneng aser MSW, Social Worker aser Gracious Society ngutetla Hoineichin Singson nunger liasü.

Iba sentong nung lokti lenirtem, kaketshirtem, Arogo tenzükertem aser yimtsüing nung alirtemi shilem agia liasü.

Iba sentong ajanga Kuki nunger takar sobaliba wazüka ayutsü aser tüzümpung, arem shiruru aser süngtolitong den purtepa alitsü nenshia metetdaktüsügo.

Sentong nung shilem ka ama süngtongtem temja liasü.

Ward 21 Welfare Committee-i aser DALT nati asükhulemsatep

Dimapur, Mongputeni/October 6 (TYO): Taoba Nagaland Upa-Lokayukta aser Chuchuyimlang yimtsüing nungi Ward 21 nung alir Mayang Lima asüba osang angazüka Ward 21 Welfare Committee, Dimapur-i asükhulemsatepogo.

Mayang Lima-i, mapa balala nung sorkar tenzüker aser lokti ajangzüker atema takok tashi teyari agüja aruogo. Pai nüburtem atema bendanga agüja inyakba ya teti akümtsübua aser nükhshia bilemettsü.

Mangyim jashi tia nung aliba mapang onoki asür kinungertem den asükhulemsatep. Tulusang Tsüngremi parnok nem tashi aser anisüngzüker agüjang ta aser asür tanüla teti tatem makadak anisüngzükdakjang ta sarasademja atar, ta Ward 21 Welfare Committee Convenor aser Secretary nati külem sangdong ka ajanga metetdaktüsü.

Kasa mapang nung Dimapur

Ao Lanur Telongjemia-ia asür Mangyang Lima kinungtsü aser kinungertem den asükhulemsatepogo. Asür Mangyang Lima ya kanga meranga inyakba, ochishir, tenendak aser kanga anepasa jembiba nisung ka liasü, aser pai bendanga agüja inyakba ajanga pa meteta alir ajaki pa akümtsübua liasü. Mapa mapa nungi anenba sülena sorkari maneni pa mapa aginüa bushir aser iba ajanga pa tashi aser bendanga agüja inyakba tali jangjatsür.

Pa asüba ya Aoer tem atema dang masü saka Nagaland nung aliba nüburtem ajak atema takoksa lir. DALT-i pa mapa tajung asoshi tetushi agütsür aser pa ama nübu tajung sotetsü sarasadema atar. Maneni DALT-isa lanurtem aser lenirtem dang pa tsüingsü nung anidaktüsü aser Nagaland tajungba ka asoshi pa nükjidong ataloktsütsü ajungshia liasü.

Phelungre nung cancer awareness sentong ayongzüka agi



Dimapur, Mongputeni/October 6 (TYO): Assam Rifles-i October 6 nü Kiphire District kübok Phelungre yimtsüing Government School nung Cancer Awareness Outreach sentong ka ayongzüka agiogo.

Kaketshirtem nem cancer nungi jenboa alitsü, takaraba nung putetsü aser taküm libaliro tajung beshitsü atema tangazükba agütsütsü nükjidong nung iba sentong ayongzüka agiogo.

Sentong nung Assam Rifles-i lecture ka ayongzüka agi, kong cancer adodaktsüba, symptom tem aser cancer tapu balala koda nokdangtsü iba indang

tangazükba agütsü. Medical check-up mapangshia agitsü, chiyongtsü shidak liromedema achitsü aser moko achiba aser yi ajemba nungi pila alitsü atema tangazükba dena agüja liasü.

Lecture sülen sensaksem sentong ka agi aser iba mapang kaketshirtemi ken o balala asüngdangba den parnok tebilemba lemsatepa liasü. Sensaksem ajanga ken o mejangjai aliba aika jangjashitsüogo aser health anepalutsü atema ajungmesogo.

Iba sentong ayongzüka agiba ajanga lokti ajangzükdaktsütsü atema Assam Rifles' bendanga agütsür aliba tali jangja metetdaktüsü.

Anemia awareness & screening camp agiogo

Dimapur, Mongputeni/October 6 (TYO): Rashtriya Poshan Maah 2025 nung shilem ka ama CDPO, Wokha Project kübok Social Welfare department-i October 4 nü anogo ka atema Anemia awareness den repsema screening camp ka tinlonglong aiür chanutem atema Urban Health Centre, Wokha nung ayongzüka katsüogo. Iba camp ya CMO, Wokha kübok Department of Health and Family Welfare den longjemer agia liasü.

Camp mapang tinlonglong aiür chanutem dak sendakba nung health awareness indang Wokha Medical Officer Dr. Chonben Ezung-i metetdaktüsü. Pai, menstrual hygiene indang onük ya lokti nung taktsü onük ka masü, saka kanga junga

anepalutsü atema lokti nem tangazükba agütsütsü nüngdaker ta ashi.

Kasa mapang nung Dr. Thungrhoni Kikon-i, oral hygiene aser dental care koda tongtibang iba indang metetdaktüsüba den, Wokha nung aliba nüburtem dang CMO Office, Wokha nung amenoka aliba Urban Health Centre nung angati dental check-up agüja aliba maongka agitsü ajungshia liasü.

Camp nung shilem agiba tetsürtem Anemia tendang aser haemoglobin ajema aliba ajanga aiür chanu 14 temang anepalushitsü tuyu aser tetsür 6 Non Communicable Diseases (NCD) atema referee asü. Sentong nungsa Department of Social Welfare-i Sanitary pad tem lemja liasü.

Wangchuk apuba dak sendakba nung SC-i Centre dang telangzüba meshir



October 06, 2025 nü New Delhi nung climate activist Sonam Wangchuk kinüngtsü, Gitanjali Angmo den advocates- Kapil Sibal (abelen), Vivek Tankha (ajichilen nungi tanabuba) aser Sarvam Ritam Khare (ajichi) nunger tangokba noksa nung angur. Gitanjali-i pa kinüngbu chioktsü mepishia Supreme Court nung ken o benokba sülen Supreme Court-i Centre aser Union Territory of Ladakh na dang telangzüba agüjang ta tuyuogo.

New Delhi, Mongputeni/ October 06 (Agencies): Tawa Ladakh nung nüburtemi longkak sashia aitba sülen climate activist, Sonam Wangchuk apuba anema pa kinüngtsü, Gitanjali J Angmo-i Supreme Court nem temepishiba ken o ka agütsüba nung ajemdaker Hombarnü SC-i Centre sorkar aser Ladakh Union Territory (UT) sorkar naprongla dang telangzüba agüjang, ta tuyuogo.

National Security Act (NSA) kübok Wangchuk pua lir aser pa tangsa chioktsü atema pa kinüngtsü SC nem temepishiba ken o agütsü. Bar and Bench-i ashiba agi, sorkar tenüing nung ken o jembir Solicitor General (SG) Tushar Mehta-i, ozüing nung ajemdaker Wangchuk apu, ta

metetdakja liasü. Ajisüaka Justices- Aravind Kumar aser NV Anjaria nati akümba bench-i Wangchuk kinüngtsü benokba ken o dak sendakba nung oshidang kecha magütsü ajisüaka iba ken o ya maneni October 14 nü angadangtsü.

Supreme Court-i Centre nem notice agütsüba dak sendakba nung Wangchuk kinüngtsü, lai SC dang pelar aser lai Jodhpur-i oa Sonam Wangchuk ajurutsü, ta metetdaksü.

Laisa social media ajanga, "Ochi temeden angutsüsa ni linük temzüing, judiciary aser India nung nüburtem dak tamang katetter," ta metetdaksü.

Ladakh yimtiba, Leh nung lanurtemi state jenjang aser India temzüing kübok 6th

Schedule nung züingoktsü atema takhangba agüja longkak aitba sülen anogo ana lir September 26 nü Wangchuk apu, iba sülen pa Rajasthan kübok Jodhpur-i anir oa jail ka nung puoka lir.

Ketdangsertemi ashiba agi, longkak aitdang rara adoktsü atema Sonam Wangchuk-i lanurtem ajungshia liasü.

Pa apuba sülen pa kinüngtsü Gitanjali Angmo-i linük Tir, Droupadi Murmu danga pa chioktsü atema tiyongtsü aita inyakdaksüner, ta mepishiogo.

Gitanjali ya Himalayan Institute of Alternatives Ladakh (HIAL) nunga CEO lir. September 24 nü Ladakh nung longkak aitdang nisung pezü asüba den aika yiruba sülen Ladakh nung alirtem anema inyakba atema lai Centre sorkar aser police-a aitsüogo.

Jaipur nung aliba SMS Hospital nung mi lendong nung nisung 6 asü

Jaipur, October 06 (Agencies): Amongnü aonung Rajasthan yimtiba, Jaipur nung Sawai Man Singh (SMS) Hospital trauma centre nung mi lendong ataloka shiranger trok rongsetogo.

Asürtemji Neuro ICU nung treatment tagidakpurtem liasü. Trauma centre in-charge, Dr. Anurag Dhakad-i, anasa aliba storage nung mi lendong atalokba mapang nung Neuro ICU nungji shiranger 11 liasü, ta metetdaksü.

Paisa, "Iba lendong nung tetsür ana aser tebur pezü; ajak senteper nisung trok süogo. ICU balala nung temongdak

shiranger 14 bo aniteta kümzüik," ta metetdaksü.

Mi adokba sülen kobi melii building ajakji moküzü agi asüing aser ibaji ajanga shirangertem aser parnok anepalurtem kanga aoksatepa liasü.

Iba mi lendong nung documents, ICU nung aliba osettem, azü sample bendenba tubes aser medical supplies aika rongdokogo.

Osangbener den jembidang hospital nungji inyaker ward boy kati, "Mi lendong atalokba mapang nungji onok operation theatre nung liasü, anungji onoki shirangertem kümzüiktsü

atema ilonga centre telung jagi ai. Yangji onoki shiranger pezü nungi asembo kümzüikteta liasü. Ajisüaka tesülenbo milak tuluba akümba agi centre telung jagi meitet. Onoki akokba tashi aika kümzüiktsü merangogo," ta metetdaksü.

Iba sülen police aru, ajisüaka milak tulu den mokozü ajanga parnokia telungi meitet.

Iba osang angashia ayaterm nung Chief Minister Bhajanlal Sharma den Parliamentary Affairs Minister Jogaram Patel aser Minister of State for Home Jawahar Singh Bedham nungeri hospital ji semdanga tensa asadanga liasü.



October 06, 2025 nü Ghaziabad nung aliba Hindon Air Force base nung Indian Air Force (IAF) sepaitemi Air Force Day parade renemshidang tangokba noksa nung angur.

Bihar nung assembly election Nov 6 aser Nov 11 anogotem nung agitsü

New Delhi, October 06 (Agencies): Hombarnü Election Commission of India (ECI)-i Bihar nung assembly election shilem ana lemsar agitsü, ta sangdongogo.

Bihar nung assembly election ji November 6 aser November 11 anogotem nung agiba sülen November 14 nü vote azüingtsü.

Osangbenertem den jembidang Chief Election Commissioner (CEC) Gyanesh Kumar-i, voters atema election inyakyim ajak tajung asütsü, ta metetdaksü.

Bihar nung polling stations 1,044 bo tetsürtemi ketdangsütsü, ta pai metetdaksü.

Paisa, "Social media nung taila osangtem anema inyaktsü aser voters amokmerenba mesüra ozüing alema inyakba mapatem khenyongi magizüktettsü. Election kanga teladak süa timi agitsü. Ibaji ataloktsü atema yimtenren party tem, voters aser osangbenertemi amalitepa inyaktsüla," ta metetdaksü.

Election Commission-i Bihar

nung electoral roll tasen renemtsü atema Special Intensive Revision (SIR) agiba sülen election agitsü. SIR kübok voters lakh 68.5 tenüing züingdokogo aser voters tasen lakh 21.5 züingokogo.

"SIR agiba sülen final voters list ji yimtenren party ajak nem agütsüogo. Nominations file asüba sülen agütsüba Voters' list ji final asütsü," ta Gyanesh Kumar-i ashi.

Paisa, "Polling station ka nung danga voters 1,200 dak tali malitsü," ta ashi.

Taruba Bihar election nung chief minister Nitish Kumar-i aniba ruling National Democratic Alliance (NDA) teloktep aser Rashtriya Janata Dal (RJD) nungi Tejashwi Yadav-i aniba Mahagathbandhan teloktep na tsüingda atongtepa tokteptsü.

Menden 243 aliba Bihar assembly nung tang BJP MLA 80, JD(U) MLA 45, HAM(S) MLA 4, Independent MLA ana, RJD MLA 77, Congress MLA 19, CPI(ML) MLA 11, CPI(M) MLA ana aser CPI MLA ana lir.



October 06, 2025 nü Thiruvananthapuram nung United Democratic Front (UDF) MLA temi Kerala Legislative Assembly kima Devaswom Minister, VN Vasavan anema longkak aitdang tangokba noksa nung angur.

State tem dang mozü dak sendakba inyakyim shidak benshitsü tuyur

New Delhi, Mongputeni/ October 06 (Agencies): Tawa Madhya Pradesh aser Rajasthan na nung aket mozü ajemba sülen tanur aika asüba dak sendakba nung Hombarnü Union health secretary, Punya Salila Srivastava-i states aser Union Territories ajak dang Good Manufacturing Practices (GMP) atema mozü yangluba units ajak nem Revised Schedule M tasenba shidak benshidaktsütsüla, ta tuyuogo.

Srivastava-i states/UTs ajak nungi tongti health ketdangsertem jaoka senden amen. Iba senden nungji Indian Council for Medical Research tongti aser Drug Controller General of India (DCGI) nung tongti ketdangsertema aden.

Srivastava-i talisa tanurtem nem aket mozü syrups ji telatet dang jemdaksütsüla, kechiyong aketba teimbaka peisasa anepadoker aser mozü treatment menüingdaker, ta ashi.

Aket mozü ajemba sülen tanur aika asüba dak sendakba nung tamalen Union health minister J P Nadda-ia senden ka ayongzüka liasü. Iba senden nungji Nadda-i ketdangsertem

dang states/UTs nungi ketdangsertem jaoka iba atemaji jembitsü tuyua liasü.

Pradhan Mantri-Ayushman Bharat Health Infrastructure Mission (PM-ABHIM) kübok Nagpur nung aliba Metropolitan Surveillance Unit (MSU)-i anogo ishika tejaklen Rajasthan kübok Chhindwara district nung tanur aika asüba osang metetdakja liasü.

Iba district nung tanurtemi ajemba aket mozü 19 samples bendenba tendangogo aser iba nungjagi samples 10 bo 'quality standards' kübok liasü. Ajisüaka aket mozü 'Coldrif' nungbo Diethylene Glycol aliba jangjaogo. Ibaji ajanga tezüingjang kanga mejungi raksatsür.

"Iba tebushitetba nungji ajemdaker CDSCO-i iba mozü yangluba unit indang license thinentsütsü tuyuogo aser ken o-a benokogo," ta Health Ministry-i metetdaksü.

DCGI nungi Dr Rajeev Raghuvanshi-i, mozü yangluba-i unit ajaki Good Manufacturing Practices (GMP) atema Revised Schedule M shidak benshitsüla, ta metetdaksü.



TIR YIMYIM YIMOBILEM (EDITRIAL)

DIMAPUR TUESDAY, OCTOBER (MONGPUTENI) 07, 2025

Terongshir telok alitsüla

Tang Nagaland nung tenemtsüing lenmang yangluba maparen nung Nagaland Foot Hill Road Co-ordination Committee purtemi anibelem aser nüngsen arema state government aser contractor-tem dang Foot Hill lenmang yanglutsü asoshi lemzükbä mapa ajak mapang shitak nung renemtsüla ta nenshia metetdaksüba, nübortemi government dang nübortem asoshi inyakba mapatem mapang shitak nung jungjunga renemtsüla ta nenshia rongshiba mapa ka asütsü. Atangji, government-ibo nübortem tsütsülen nungi Foot Hill Coordination Committee tenteta government-i lenmang yangluba maparen nung tebang maitdaksüner. Atangji, nübortem asoshi government-ji temulung lemtetba government asübo, ita sen tajung agüja lenmang yangluba mapatem reprangtsü asoshi inyaker peria shima yuja lir, anungji nübortem rongnungi telok ka tenteter government-i inyakba mapatem mita reprangtsü nüngdak madoker. Ajisüaka, asen government-bo yamaji masü, temulung malemstsüka, sen crore ka jenjang mapa crore ter endokyonga merenemtetsü. Ibaji kechibaer tangu aser temetet dang, anungji government mapa shitak inyaka mapang shitak nung atemtsü asoshi nübortem rongnung terongshir telok nüngdaker. Iba telok jagi government-i inyakba mapa ajak mita reprangtsü aser tim mesüi inyaka alibatem shitak inyaksü rongshitsüsa aser ano mapang shitak nung mapa merenemtet ajokshia alirtem danga mapang shitak nung renemtsü rongshitsü. Iba amaji kodang, tang NFHRCC-i inyakba ama, Delhi o Kohima na tsüngda Nagaland nung terenlok mapa inyaksü asoshi yokba sentong aser senotsü indang jungjunga bushisüngdanga inyakdir, idangjibo ma ta state government inyakyima junger alitsü aser state government jungra, manger sangwa nung Nagaland tilaka, tangar yimti nung kiyong ka nüboa masü aliba state yabo manger sangwa nung topur jungjunga yanglur alitsü. Aji oda, koba mapa nung südirsüaka terongshir nüngdaker, kechiyong terongshir mesüra peii inyakba mapa nung tangar kari mita repranga matara, peisasa tezüdanga adoker aser mapaji meinyak ser angati sen agizüka agitsüba dang bilemer. Asenok tia ajung ta ashitsüsa, asen lima nungbo lokti tentet ya zünger mezüngma tenteta lir, ajisüaka ano külenbo asenok tia majung ta ashitsüsa lokti tentetemi pei lima aser nübortem ajungtsü asoshibo government-a merongshir aser peisasaia kecha meinyaker. Aji oda, asen lima nung lokti tentet tenteta alirtem yabo kar tangar dang donation sarua lokti senden alitsü aser ano karbo tangar nungi tenla imlaa benjong ayongzüksü ta asüba lokti tentettem dang lir, iba jagi pei kolok mainer, anungji pei lima mainer. Item lokti tentettem lenirtemi anir nübortem ajak tang tashi pei kolak nung pei khu bener tetsüng agi lishi ajemshia senzüyonga ola madoki jangratema senzür. Iba kolokji asen ajak dak dena lir aser ibaji alar kolok adenertem. Iba kolok nungi asenok peisasa salar adoktsüla aser pei nübortem aser pei lima asoshi teinyaker mesüra terongshir kaka kuma alitsü tim. Idangjiang, merongshiyonga asen lima nunga, tangar limatem nung ama, terenlok mapatem ajak mapang shitak nung mapa shitak renemer alitsü. Iba ama anogo ka atema asenok ajaki rongshidi aser inyakdi.

OLEMSABANG

Yimsusuri nubur akümtsüba ken o kümdanga jembitsüla

~ L. Kika Pongener

Mapang tatsüka sua ogo, osangkaket azüngdang; aser social media sabang balala reprangdang; nuburtemi meyongnem (Vote) agüja shimetba yimsusur kari kanga junga mebilemdangi; nubur temulung yirutsüsa; ken o mashi-mashi jembiba ngua aser angazüka; nubur aika kanga temulung mepelai; kanga sasa-a bilemogo; aser kangasa sungmanga bilemogo...!!! Tssuuuaa...!!! Nuburtemi linuk aser nubur madak yimsu asütsü temulung lemteta meyongnem agüja shimetba yimsusuri iba tashi dang jembir nooo...!!!??? ta nubur aika kanga sungmanga bilemogo. Yimsusur shirnoki kanga junga mebilemdangi nubur temulung yirudaktsütsüsa ken o mashi-mashi jembizüka yoker; parnoki jembiba o jagi parnok tangatetbaji iba tashiji danga ta nubur dang sayur. Nuburtemi meyongnem agüja shimetba yimsusurji nubur meyonger ka-ka lir ta angatetsüla. Nubur madak yimsusur kaji; nubur tulu-tila, tanak-temesung ajak den küsa lirumedema litetba; ajemalua tila kümtetba aser taremsük aliba nisung asütsüla. Yimsusur kaji nuburtemi akümtsübuttsüsa mera-ket-keta alitsüla. Yimsusur kati lokti sabang nung; aser yimjak nung ken o kanga arok-aroka shisadanga bilemdanger dang; nubur temulung meyrudaktsütsüsa; kanga dang kümdanga jembitsüla.

Yimsusurji nuburtemi linuk aser nubur madak yimsu asütsü shimetba nubur meyonger ka-ka lir. Anungji yimsusur ajaki pei yimtsüng aser pei constituency atema dang masü; saka Naga lima ajak atema suoki yia bilema jembitsüla aser inyaksüla. Yimsusur kaji pei ajungtsü dang bilemba; tangatetba temesu masü; saka tangatetba kanga tesadem asütsüla. Yimsusur ajaki angatetsüba...Nenok iba tamaren menden nung mendaktsüba; nenok sasa anguba masü; nuburtemi maongka agüja shimetba agi amener ta angateta; nubur tulu-tila, tanak-temesung ajak dang küsasa meimtsüla aser akümtsübuttsüla. Akok tashi yimsusurtemi lokti-senden aser mongdang balala nung ken o jembidang; nubur temulung meyrudaktsütsüsa kanga kümdanga jembitsüla. Yimsusur ka Social media sabang balala nung nuburtemi tetla-tetshiba jagi alima nubur matsüngdang tenung menuker. Yimsusuri lokti sabang aser yimjak nung ken o mebilemdangi jembizüka yoker....Nubur nem yimjak nung tetla-tetshia jembidaktsüba aser nubur dang tatok nangzükbaji alima matsüngdang maaksu lir. Anungji yimsusurji nubur ajaki akümtsübuttsüsa mera-ket-keta alitsüla.

Ano asen Ao lima nungi adokba MLA-tem ajak nem kanga suoki yia bilema inyadaktsünubaji....Asen Ao lima yimtiba Mokokchung town renloktsü atema Aor tatar ajak longjemer inyadaktsünur. Asen Ao lima yimtiba Mokokchung town nung; akhidang tamabur yimsusurtemi inyaka yutsüba terenlok mapa kar dak alaka; tasen renloka inyakba aikabo mangur. Anungji Ao lima nungi adokba yimsusur ajak longjemer; Mokokchung town renloktsü atema; kanga temulung agüja inyaksü ajungshir. Aotsü Aor yimsusurtem, tulurtem aser nutsüng-nubur aika Kohima aser Dimapur nungang pei ki tajung yanglur; idakji dang teret endoka alitsü akok; saka asen Ao lima yimtiba Mokokchung town ya Aotsür Aor ajaki kanga keta-sena bilemstsüla. Ano Ao lima tzükong terok nung aliba town-tem; tuluba nungi tilaba tashi kwika lir; item ajakji tajungba renlokaktsütsü atema; Aor yimsusurtemi kanga temulung agüja inyaksü ajungshir. Takoktsü lenmang dang lira, Mokokchung District nungi ano District ka-ana razüka akümyongjia tajungba dang asütsü. Ibajagi asen Ao lima-sa renloktsü aser asen Aor-sa rongsenketzüng nung jenjang tajungba akümtsü. Ano asen Ao lima Assam nunger den alimang tulu-ka agi arrtsü (Boundary) sua lir....Anungji asen lima ali tilaka danga rakzüka bener meyoktsü asoshi Aor yimsusur ajaki temulung agüja inyaksü ajungshir. Aji oda, Aotsür Aor lennir aser senso kari Ao lima nung tzükong terok rongnung; iba tzükong ya tang kanga tongtipangba; aser iba tzükong yabo kanga tongtipang masü....ta Aor tzükong terok rongnung tanak-temesung bendanga angateta lira; ajibo kangasa temesu tangatetba aser kangasa tamashi tangatetba asütsü....anungji iba tangatetbajibo melenshitsüla.

Tanü putu yabo akhi putu ama-to masü; tang kinuk-kisang ka nung kechi jembir, kechi inyaker aser kechi ataloker; ibaji iba second-minute tsüngda nungjisa social media sabang ajanga alima ajunga sunga-atoker; aser "Shidi kolak Per agi meküpbangtet" ama miimbanga ayutsü makoker. Tawa Kaziranga University Jorhat nung azünger kaketshir kati ken o tilaka mekümdangi jembizüka yokba agi lendong tulu ataloktsüsa tensa mazüokteti akümba ajangshia aruogo. Anungji tanu putu nungbo yimsusur aser nubur ajaki lokti sabang aser yimjak nung ken o jembidang; kanga junga shisadanga bilemdanger dang ken o kazüka yoktsüla. Talisa, yimsusurtemi nubur tuluba nungi tilaba tashi ajak dang küsa meima bentshitsüla aser akümtsübuttsüla; kechiyong yimsusurji linuk aser nubur madak yimsu asütsü nuburi shimet. Taoba ita nung Nepal lima nung atalokba asenok ajaki nguogo....Democracy yayim agi yimsu asüba linuk ka nung nubur dak tashi tulu lir; anungji yimsusurtemi nuburtem ya kanga yanua (under estimate) mebilemstsüla aser mezüngmeshi masütsüla. Ano yimsusur ajaki osang zülur aser 'media' ya kanga akümtsübuttsüla; kechiyong osang zülur aser 'media' dak linuk ka anokshidaktsütsüsa tashi tulu lir. Anungji yimsusur ajaki lokti sabang aser yimjak nung ken o jembidang; nubur temulung meyrutsüsa; aser nubur akümtsüba ken o kanga kümdanga jembitsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

University of Tennessee nung kaketshir 500-i Khrista agizük



September 30, 2025 aonung University of Tennessee campus nung UniteUS sentong agidang tangokba noksa nung angur.

October 06, 2025: Mongolbar aonung (September 30) University of Tennessee campus nung ayongzükba UniteUS sentong nung kaketshir 8,000 dak tali adenshia Tsüngrem külem aser kaketshir 500 dak temai Khrista nem taküm bendanga agütsü.

UniteUS ya evangelistic outreach sentong ka lir aser iba sentong ya US tesem balala nung college aser universities campus nung agia arudar. Tang tesüsa iba sentong ya Thompson-Boling Arena, Knoxville, Tennessee nung agi. Ministry-i sangdong ka ajanga, "Taonung University of Tennessee nung kaketshir 8,000 dak tali adenshia Yisu tenüng ajungkettsüogo aser nisung 500 dak temai tekümtet nguogo. Tsüngremi mapa tulu inyakba atema tenüngsang agütsür," ta metetdaksü.

Iba sentong nung Knoxville school nungi kaketshirtemia yimjak nung Yisu tenüngsanga liasü. Kaketshir kati social media ajanga, "Taonung nisung

noklang aika baptiba onoki kuli süa nguogo. Nisung meyrjang aikati Yisu nem tenüngsang agütsü. Tan putu lanurtem taküm aika melenshidar aser iba nungji UniteUS-i tongti shilem agir," ta metetdaksü.

UniteUS sentong ya mezüng 2023 küm September ita nung Auburn University nung tenzüka liasü. Iba sentong nungji kaketshir 5,000 shi aden aser anasa aliba awatsüng ka nung kaketshir 200 dak tali baptia liasü.

Tamalen osangbener den jembidang UniteUS tenzükla aser sayutsüngir, Tonya Prewett-i, "Tsüngremi kü nem Unite Auburn mangdang agütsüba mapang nung kechi ataloktsüar ni memeteti liasü," ta metetdaksü.

"Auburn nung sentong tembangba sülen kaketshir meyrjang aika matsüngdang aika baptiba ni bilemteter. Tsüngremi maneni mapa inyakdar," ta lai metetdaksü.

UniteUS sentong aika nung IF:Gathering nungi Jennie

Allen-i sayutsüngia arudar; laia Instagram ajanga college campus aika nung Tsüngremi mapa tulu inyakba lemsatet.

Allen-i, "UniteUS ya tanü putu nung sayatenya ka lir. Tanur aika arua iba sentong nung adener, pei menen nangzüker aser Khrista sülen anidaksü telemtetba agia baptir. Stadium sünga tanurtem adenshir nüktzü aidoker aser sarasademer," ta lai metetdaksü.

Tawa University of Tennessee nung UniteUS sentong nung kaketshirtem den jembidang Prewetr-i, "Nenok temenen nangzükan, iba campus nung temenen menaba nangzükan, iba yimti aser asen linük menen nangzükan. Temenen talenba nungi saladi aser asenok ajaki Yisu nem bendanga agütsüdi," ta ayongzüka liasü.

Khristmas mongpu matongdangsa ministry-i Arizona, Ohio aser North Carolina nung aliba college aika nung UniteUS sentong ayongzüka agitsü tebilemba lir.

ANOGO ABEN TSÜNGREM DEN

Tsüngremi kechi aginer (T. ken 50:7-15)

"Tepela tenla Tsüngrem nem agüjang: aser ne tezüngzükba tematiba nem agüjang: aser timtemba anogo nung Kü dang jaang; ni na kümzüksü aser nai ni sentsüwangshitsütsü" (t.14,15). Nüburu Tsüngrem obendangdaki arur aser ashir, "Nai onok o bendangtsü makok. Onoki Ne nem tarungba tenla agüja arudagi." Aser Tsüngremi langzür, "Ne tenla atema ni na martsütsü; kechiaser ne tarungba tenla maneni kü jakdang lir. Ne kidang nungi ni nashi pungchi magitsü, aser ne nabong ki nungi nabong tepung magitsü" (t.8,9). Ano Pai ashi, "Ni yaa ali nunga ni ne dang memeshi-i lila; kechiaser alima aser yangji sünga alibaji kü meyong lir" (t.12). Pai ashibaji "Ni kechi agütsü iba nung jagi nai Kü nem tarungba tenla agütsür."

Ibaji shisadangang. Kodang nai auso nung tenla inoktsür, nai Tsüngremi magütsüba kar agütsür asü? Mapa inyaktsü asoshi ne nem tashi shibai agütsür? Tsüngremi. Shibai wabang aser mapa inyaker? Tsüngrem. Anungji kodang asenoki Tsüngrem dangi oset tenla bener arur (aser Pai aji aginer), Pai kechi agüja aka iba nungi dang asenoki bener arur. Pai agütsüba nungi asenokia Pa nem agütsütsü Tsüngremi aginer: "Tepela tenla Tsüngrem nem agüjang; aser ne tezüngzükba tematiba nem agüjang" (t.14).

Tsüngremi aginüba tenlaji asen mulungjang nungi adoker- Pa dang ajaba, pa tenüng asangba aser tashi angaba. Pa dangi tenüngsang aser tetushi tenla bener arung. Tsüngremi asenok nem tenüngsang agütsü aser aji "Kü nem meyipa agüjang" ta mashir. Masü, Pa tushitsü asoshi Pai asenok atar. Pa dangi tashi angaba bener arung: "Ne tezüngzükba tematiba nem agüjang" (t.14). Pa dangi sarasadem bener arung: "Timtemba anogo nung Kü dang jaang" (t.15). Kodang asenoki item tarungba tenlatem bener arur, asenok Kibuba sentsüwangshitsür.

Tsüngremi ne mulungjang nungi adokba tenla aginer. Aiben asenok Pa nem tenüngsang aser tetushi magütsüi Pa nungi agizüker. Tanü nai Tsüngrem nem sentsüwangshi bener arudaktsüner asü ? Pai na asoshi kechi inyaker iba asoshi tenüngsang agüjang. Pa o tashi angang. Ne tebilemtsütem Pa dangi bener arung. Item ajakji Pai pasasa sentsüwangshi bener arutsü mapang tajungji lir.

S Korea nunger missionary, Kim Jung-wook tang tashi kong aliar memetet



October 06, 2025: South Korea nunger missionary, Kim Jung-wook North Korea nung lia apuba sülen küm 12 ajunger, ajisüaka tang tashi pa kong-koma aliar memetet, ta International Christian Concern (ICC)-i metetdaksü.

Pa apuba mapang nungi tenzüka tang tashi par kibong züngsemtem den mejembidaksür; pa kong aliar

memetet aser tang koma aliar memetet.

2013 küm October 8 nü North Korea nung ketdangsertemi missionary Jung-wook pua liasü. Pai Khristan kakettem North Korea telungi bener aiba atema pa apu.

Taküm March ita nung osang ka ajanga ashiba agi, missionary Jung-wood den külemi South Korea nunger

missionary anata pua liasü, ajisüaka tang tashi parnokji kong-koma aliar memetet mesüra parnok taküm ali asü maliar memetet.

Taküm January ita nung Open Doors-i, Jung-wook ya China kübok Dandong nung missionary inyaka North Korea nungi jena aruba refugee tem pai yaria liasü, ta metetdaksü.

North Korea nungi China-i jena arur refugee tem den pai Khrista osangtajung lemsatetpa den külemi parnok nem chiyungtsü aser tejenokdak agütsü.

2014 küm February ita nung United States Commission on International Religious Freedom (USCIRF)-i, "Osangbenertem senden ka nung Jung-wook nem kangshia pai aibelenogo ta nangzükdakja liasü. Pai underground Arogotem-a tenzüka ta pa nem kangshia nangzükdakja liasü," ta metetdaksü.

Ita asem sülen May 2014 nung Jung-wook taküm piyong tepuokdak ayutsü atema obendang agüja liasü. Linük anema asalentong yangluba, linük anema osang tai prokba, linük anema inyakba aser itdangitba mapa inyakba ken otem nung pa aitsü.

Yaküm September ita nung U.S. Department of State-i sangdong ka ajanga, "Pa [Jung-wook] den South Korea nunger pongu tang tashi North Korea nung tepuokdak alitsü ta bilemer. Parnok karbo tepuodak küm 10 abensaogo," ta metetdaksü.

US Department of State-isa, "North Korea-i tim masüba nung missionary tem aser yimtenren nung tanemertem apuba ya tamangba yimsü temeden nokdangtsü aser bendanglen osangtsüsang nokdangtsü atema inyakba lir. North Korea-i asalentong yanglur meimchir temeden

anema inyakbaji onoki sashia aitsür aser tim masüba nung pua alirtem ajak chiokang ta takhangba agütsür," ta metetdaksü.

September ita nung Christian Solidarity Worldwide (CSW)-ia missionary Jung-wook densema North Korea nung pua aliba South Korea nunger missionary tem chioktsü atema sarasademjang, ta ayongzüka liasü.

"North Korea nung puoka aliba South Korea nunger missionary asem- Pastor Kim Jung-wook, Pastor Kim Kook-kie aser Pastor Choi Chun-gil nunger atema maneni sarasademtsür. Parnoki South Korea atema itdangitba mapa inyak, ta parnok aitsüba sülen küm 10 dak tali tepuokdak ayur. Parnok kong aliar metettsü aser ochi temeden angutsü atema sarasademjang," ta Christian Solidarity Worldwide-i ayongzüka liasü.

AO OSHI ANGAZÜKDAK:**TANÜ ANGAZÜKTSÜBA OJANG****Tingaktingak**

(adi) jangratema tululu chiyongba (enjoy eating, eat satisfactorily)

* Onok ajak ozü kidang tingaktingak ta chiyonger mapai ao

Tinu

(n) Kidong o kidong na jatepba (brother from the same clan)

* Lipokba küna tinu ta jateper.

**OLONG PAITEP # 7292**

1				2				3		4
5		6								
							7			
8										
										9
		10					11			
				12				13		
14										
							15			
16										

TIPIEN

2. Auonung chiyongtsü asenba

-(7)

5. Mangyimba mapang

-(5)

7. O tamendakdak

-(4)

8. Peidak malangba

-(7)

10. Juli

-(7)

12. Sen ayudak

-(7)

14. Tenük agi ajitet

-(4)

15. Tamajung aküm

-(5)

16. Apuso

-(7)

LANGTSÜNGLEN

1. Lenmang

-(7)

2. Aor kidong ka tenüng

-(6)

3. Tenarong maten

-(6)

4. A ____ g

-(3)

6. Mopung apodoka

-(3)

9. Tongtipang tagitsü

-(7)

10. Menungra bilem

-(6)

11. Aiür

-(6)

13. S ____ k

-(3)

14. T ____ r

-(3)

OLONG PAITEP # 7291 TELANGZÜBA**TIPIEN :**

1. Yiar, 3. Tesola, 7. Yimra,

8. Tangar, 9. Peria, 10. Tanur,

11. Tasen, 13. Lemjem, 15. Tambu,

16. Khuret, 17. Sang.

LANGTSÜNGLEN :

1. Yimti, 2. Amen, 4. Shiner,

5. Alaka, 6. Satan, 9. Putet,

10. Tembar, 11. Tatok, 12. Amang,

14. Jala.

NAI-A YA METETTER

France nung "Wind tree" ya invention khenyongi balaka lir, kong süngotu mesükba turbine tem inokja lir aser iba yagi ola madoki electricity adokdaksür.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimym@gmail.com nung yokang mesüra Tir Yimyim bureau tem nung agüjang.

Manipur police-i temesepba mozü shibelener ana apu**Imphal, Mongputeni/ October 6 (Agencies):**

Security force team kati temesepba mozü shibelener ana den World is Yours (W/Y) tablets seret ana talep 89 nung tema bener lia puogo. Tena ket nungisa sen lakh 38 pua liasü.

Manipur, Imphal East nung Heingang police station kübok Khomidok Sorok Mapal tesem meita aoba mapang temesepba mozü shibelener nung ya pua liasü.

Manipur police-i Hombarnü sangdong ka ajanga ashiba agi, temesepba mozü shibelener ana ya Md Ithem Khan (39) aser Raju Khan ta jangjaogo aser tenaprongla ya kasa district

kübok Khomidok Sorok Mapal tesem nung alir.

Border Security Force (BSF) nungi temesepba mozü shibelenba indang osang tejangja angazükba sülen Imphal East commandos, Heingang police, Anti-Narcotic Task Force, aser BSF 164 Battalion nung longjemer iba tesem ya longbang aser ajungbena meita oa liasü, ta osang ajanga metetdaksü.

Md Ithem Khan'er ki meita aoba mapang iba team yagi sen lakh 27.52 ngutet aser cardboard box ka nung miima yua aliba W/Y tablet talep 39 nguteta liasü.

Kasa mapang nung Raju

Khan'er kidang sen lakh 10.50 ngutet aser kima atsü nung W/Y tablets talep 50 miima yur aliba nguteta liasü.

Tena ket nungi apuba temesepba mozü ya international shishilembadak sen crore 2 shi alang asütsü ta ketdangsürtemi asatetogo.

Sepaitemi temesepba mozü, sen aser mobile phone tem apu aser aija alir ana ya Heingang police station nem bendanga agütsüogo.

Police-isa, parnoki aija alir anema Narcotic Drugs and Psychotropic Substances (Amendment) Act 2023 kübok ken o ka benokogo, ta metetdaksü.

Zubeen asüba ken o: Assam Police Singapore-i maotsü**Guwahati, Mongpurteni/ October 6 (Agencies):**

Kentener Zubeen Garg asüba ken o bushisüngdangtsü atema Assam Police Singapore-i aotsü nüngdak madoktsü, ta Assam CM Himanta Biswa Sarma-i Hombarnü osangbenertem dang ashi.

Assam nung nüngtugu kentener Zubeen Garg ajungbena asüba bushisüngdangtsü atema taoba mapang SIT ka tentettsü, saka parnok nem October 6 nü tashi mapang lalettsüba tembangba tashi nunga Singapore nung amendaker alir ka danga ken o ashishitsü marui süitemdaksüogo.

Tatembangbuba anogo tashi nung osang aiben agütsüogo, saka bushisüngdang nung shisema aliba nisung ka danga Assam-i meyipa maru, mesüra parnoki SIT den teka amtepa inyaksangshi masü.

SIT yagi Tanmoy Phukan, Abhimanyu Talukdar, Debojyoti Hazarika, Rupkamal Kalita, Siddharth Bora, Parikshit Sharma, Sudipta Chatterjee, aser Bazid Ahmed nung ibe lendong atalokba mapang dena alirtem aika jaokogo.

Ketdangsürtemi ashiba agi, parnok rongnung kati danga telangzüba magütsü aser bushisüngdangertem dangi maru. Parnok rongnung kari jurila maparen aliba aser technical tsütsü tetsükdaksü aliba metetdaksüogo, saka parnok timba kati kecha telangzüba magütsü.

SIT ketdangsürtemi ashiba agi, tenük kuli agütsü tongtibangtemi teka amteper minyakba ajanga bushisüngdang kanga meyilongi aoer.

Criminal Investigation

Department (CID) nungi source temi ashiba agi, team yagi temzüng ozüing dak ajemdaker tanga jenjang agitsü inyaktepdar, kong nisungtem jaokshitsü mesüra official osang sentoka toktsürtem anema jenjang tesashi agitsüba densema alitsü imlar.

Assam Chief Minister Himanta Biswa Sarma-i taoba mapang iba ken o jangjashitsü dang sorkari koba tashi inyaktettsü iba indang metetdaksü.

"Onoki parnok bendanglen nungi tashiyim agi anir marutettsü. Singapore nung Assam police kecha tashi mali. Onoki parnok kinungertem aser diplomatic channel tem ajanga inyaksü," ta pai ashi.

CM Sarma-isa, "onoki parnok nem October 6 tashi mapang agütsüogo. Parnoki teka amteper minyakba onoki jenjang tesashi agitsü," ta ashi.

Zomi Council-i senzügenpongtsü tetuyuba agütsü**Imphal, Mongputeni/ October 6 (Agencies):**

Zomi Council (ZC)-i, tayimtsü ajanga senzüba Zomi nung dang Imphal International Airport mamshitsü tetuyuba ka agütsüogo.

Manipur nung Zomi nung ya India, Myanmar aser Bangladesh nung prokshia aliba Zo kin nung shilem ka lir, kong ano Paite, Zou, Gangte, aser Vaiphei amala kin tilala densema lir.

Hombarnü sangdong ka ajanga ZC Headquarters nungi Information and Publicity Secretary Mary Jones Vung-i ashiba agi, tawa Zomi nung

aliba tesem nungi passenger kari Churachandpur aser Imphal na tsünga helicopter service amshiba angazükogo.

Kasa sangdong ajanga ashiba agi, item senzügenpongertem timba Imphal Airport nung anen aser idak nungjiaka tayimtsütem nung mener India kübok state balalai oa liasü.

ZC-isa, ketdangsür aser civilian tem densema local nisung kari Churachandpur nung alirtem dang helicopter aser tayimtsü service amshitsü ajungshia arudar.

Council-i ashiba agi, sorkari parnok kümzüka toktsütsü ta

tenangzüka ka magütsü, mesüra Imphal lenden nung alir lenirtem den Zomi nungertem kecha tetsükdaksü makai senzüdaksütsü atema nangzüktepa mali.

ZC-i, Zomi nung dang parnoki osang tejangjaba ka magütsü tashi iba lenmang nung mesenzütsü metetdaksüogo.

Council-i ashiba agi, parnok tebilemstü tongtibangtibaji Zomi nungertem ajak kümzüka toktsütsü asoshi lir.

Tetuyuba sülen manidaki timtem lendong kar danga ajangshira aji pei khuret asütsü, ta council-isa metetdaksüogo.

Nisung asem nem 2025 Nobel Prize in Medicine agütsü

Stockholm, Mongputeni/ Oct. 06 (Agencies): Scientists Mary Brunkow, Fred Ramsdell aser Shimon Sakaguchi nungeri "peripheral immune tolerance" dak sendakba bushitetba mechi 2025 Nobel Prize in Physiology mesüra Medicine takok nguogo, ta iba sempet agütsüba tentet ajanga Hombarñü ashi.

Brunkow ya Institute for Systems Bology, Seattle nung senior program manager lir. Ramsdell ya San Francisco nung aliba Sonoma Biotherapeutics nung scientific adviser aser Sakaguchi ya Osaka University, Japan nung aliba Immunology Frontier Research Center nung distinguished professor lir.

Nobel Committee indang Secretary-General Thomas Perlmann-i Hombarnep phone ajanga Sakaguchi den dang jembitet ta ashi. Brunkow aser Ramsdell dangi voicemails dang yok.

Peripheral immune tolerance ya nisung temang nung immune system dak kongshitsü aliba kumzüka ayur aser "foreign invaders" melen temang nung aliba tezü balala nungang kongshir.

"Parnoki iba ya ngutetba ajanga cancer aser autoimmune diseases amala tashidak anepalutsü yimya tasen asoshi tamendak dak agütsür aser nungmesor," ta iba sempet agütsüba tentet ajanga sangdong ka nung ashi.

Medicine nung takok angur ya Nobel Assembly of Sweden

France PM Sébastien Lecornu ita ka majungdang mapanungi anenogo

Paris, Mongputeni/Oct. 06 (Agencies): France indang Ato Kilonser Sébastien Lecornu mapa yutsüogo, shibai cabinet tasen shimer anogo ka majungdang iba mera ya agir.

"Ni ato kilonser ka ama inyaktsü tensa masü," ta Lecornu-i Hobarnep ashi aser political party temi tangatettep kati arutsü memulungba aija liasü.

Lecornu-i Hombarnep Tir Emmanuel Macron den ajurutepa ghonda ka shi senden amenba sülen Elysée palace ajanga iba osang ya sangdonga liasü.

François Bayrou indang taoba sorkar chirepba sülen Lecornu ya ato kilonser ama shomer anogo 26 dang lir iba osang ya sangdonger.

National Assembly nung aliba party balala Lecornu indang cabinet kanga sashia aitsü, kong Bayrou indang cabinet nung alirtem timba memelen aser par sorkar ya laodaktsütsü amokmerena liasü. *(Maneni tapak 8 nung...)*

indang Karolinska Institute medical university ajanga shimer aser sen 11 million Swedish crowns (\$1.2 million) den Sweden chuba ajanga gold medal ka agütsür.

Nobel Prizes ya Sweden nunger dynamite ngutetsang aser shishilempar takar Alfred Nobel indang rongsen ajanga amenokba lir. Iba sempet ya 1901 nungi science, literature aser peace nung alakteta mapa tajung inyakba atema agüja aru, aser World Wars mapang ang anena liasü.

Economics prize ya mapang tatsüka lir bendenlok aser iba sempet ya Sweden indang central bank Riksbank ajanga

agütsür.

Takoker ya institutions balala nungi takotet committee temi shimer. Peace Prize dak alaka tanüngba sempet ajunga Stockholm nung agütsür.

Taoba mapang Nobel Prize in Physiology or Medicine ya ajaki kanga junga meteta aliba scientists Alexander Fleming nema agüja lir.

Taoba küm iba sempet ya U.S. scientists Victor Ambros aser Gary Ruvkun nem agütsü, shirnoki microRNA bushiteta liasü.

Küm shia Nobels agütsüba ya medicine nungi tenzüker aser iba sülen tanüngba sempet tem agütsür.

PELABA LEMSATEPER

28th September, 2025 anogo tsüingsak mopungi ki-o-jen raksatsür shisabulua aliba mapang ana aser talang nungi tsüngtong arua rongsen aser sarasadem den nübu agi yariba asoshi nenok ajak dang Tsüngrem tenüng sanga pelaba lemsateper. Talisa item telok dang mejeta pelaba lemsateper;

- Ungma Council
- Ungma Jenangsanger Kosasanger Pusu Menden
- Ungma Arogo
- Yimlang Longkumer kidong
- Shimpo kidong Ungma
- Longkumer Tanubo Semchir

Tsürabur
Sentilemzüng Lkr
Ungma Imlang

Office of the Sungkomen Ward Yimden Mokokchung Town

KUKUAAITSÜR

30th September, 2025 anogo Sungkomen Ward menentsüa meimchir sobaliba dak mapetba tashiyim mapa tamajung koba inyakogo, iba mapa ozü yimdeni kukua aitsür. Aser iba ken o dak sendakba ward temzüng nung aliba ama yimdeni tatem tashi bushitsü.

Sd/-
Mr. Yangerjungba
Chairman
Sungkomen ward

Sd/-
Supongwati Jamir
Secretary
Sungkomen Ward

OFFICE OF THE CHUNGZIA BAPTIST AROGO TEPELA LEMSATEPER

Chungtia lima Anentsü lendong ajanga Ki o-jen teraksa tulu ajurur nüburtem timtema aliba mapang,Arogotem,kija aser lokti balala,shirnokisa onok timtem shisabulu khuret agi neneter alidang sarasadem den nungdakba oset balala,nübu aser rongsen tulu bener arua timtema aliba kibongtem asoshi teyari tulu agütsüogo. Nenok ajak dang Chungtia Arogoi kanga dang pelaba iba osang ajanga lemsateper. Takoksang Tsüngremi nenok mapa tajung yari kija kibong aser Arogo lokti ajak maneni moajang ta asübaji ozü Arogopur tamang Sarasadem.

Teyari agütsürtem tenüng yamai alitsü:

S/L no	Tenüng	Rs.
1	Meküle B/A	20000/-
2	Khensa B/A	30000/-
3	Changkiyimlang B/A	10000/-
4	Changki B/A	30000/-
5	Chuchuyimlang B/A	50000/-
6	ABAM	30000/-
7	Süngratsü B/A	20000/-
8	Chumoukedima Town Ao B/A	100000/-
9	Ungma B/A	100000/-
10	Settsü B/A	5000/-
11	Alichen B/A	20000/-
12	Mokokchung B/A	20000/-
13	Longkhum B/A	30000/-
14	Tzüsapang B/A	15000/-
15	Ngati B/A	5000/-
16	Waromung B/A	50000/-
17	Aliba B/A	30000/-
18	Mangmetong B/A	50000/-
19	Artang B/A	20000/-
20	Yimyu B/A	50000/-
21	Longmisa B/A	20000/-
22	Molungyimsen B/A	20000/-
23	Nokon B/A	10000/-
24	MTABA	50000/-
25	Rev. S. Tajung Pastor Molungyimsen B/A	1000/-
26	Molungkimong B/A	30000/-
27	Model Village B/A	10000/-
28	Yisemyong B/A	10000/-
29	Debuia B/A	20000/-
30	Longchemdang B/A	10000/-
31	Satsü B/F	10000/-
32	Kinunger B/A	10000/-
33	Lakhuni B/A	10000/-
34	Unger B/A	10000/-
35	Meyilong B/A	5000/-
36	Moalenden B/A	5000/-
37	Mokokchung Compound B/A	20000/-
38	Merayim B/A	10000/-
39	Kumlong B/A	100000/-
40	Salulamang B/A	5000/-
41	Aosenden B/A	10000/-
42	Rev Mokoktoshi Pastor Aolichen	1000/-
43	Alongtaki B/A	5000/-
44	Khar B/A	30000/-
45	Impur B/A	10000/-
46	Rev M.Laka Tzüdir Pastor & Adianutem	50000/-
47	Chuchuyimpang B/A	20000/-
48	Longchem B/A	20000/-
49	Marepkong B/A	10000/-
50	Chubayimkü B/A	5000/-
51	Longjongkong B/A	10000/-
52	Chungtiayimsen B/A	50000/-
53	Chungtiayimsen Arogotsür	20000/-
54	Imkongmeri Mission Board (CBA)	20000/-
55	Jalukhi Town Ao B/A	10000/-
56	Mrs. Temjenyula Kohima	1000/-
57	Changtongya B/A	50000/-
58	Kohima Ao B/A	200000/-

WAROMUNGTSÜR
TELONGJEM
KOHIMA

GOLDEN
JUBILEE
MUNG SENTONG

WAROMUNGTSÜR
TELONGJEM
KOHIMA

1975-2025

GOLDEN JUBILEE

ANOGO
October 11, 2025

MAPANG
11:00 AM

TESENTEPDAK : MÖLU KI. KOHIMA

Omen: Nükmen Tashi Itshi

Tengti O Jembur

Dr. CHUBATOLA AIER
Principal, C-Edge College, United Village,
Chumukedima.

Pianist
Dr. IMLIRENLA LONGKUMER

SENTONG ANIR
Sp. Sentilong Longchar || Kr. Toshinungla Aier

LAI ZÜNGA SARASADEMTSÜ
Wb. Tsüktimeren Mollier
Pastor Waromung Baptist Arogo (WBA)

SANGRO
Kr. Asola Aier || Sp. Benlimonger

PELA-A AGIZÜKBA
Wt.Temjenmongla
Tir Waromungtsür Telongjem Kohima (WTK)

TETUSHI AGÜTSÜBA MAPANG
Wt. Nunghshitula Aier

KEN ATENTSÜ
SAMARO

JUBILEE NÜNGU KAKET SAYATSÜ
EDITORIAL LUDEN

TEPELA O
Wb. I. Chubatoshi
Tir Kohima Waromung Senso Telongjem (KWST)

Wt. T. Bendangsenla
Tir Watsü Telen Kohima

WAROMUNGTSÜR TELONGJEM KOHIMA ASOSHI
TEMOATSÜ MESHIA SARASADEMTSÜTSÜ
Wb.Temjen Sempo, Pastor KABA

KEN KA
Jubilee Choir

ONÜK
“Nükmen tashi itshi”

JUBILEE PANGZÜNG
Convenor, Pangzüng luden

MELEPZÜNG O
Convenor, Planning luden

TELOK KEN
Tsüngrem temeim tulu

TATEM SARASADEM
Rev. M. Asangba Longkumer

Dimapur nung 1buba Inter-Ward Football asayamung tenzükogo



Dimapur, Mongputeni/October 6 (TYO): Dimapur Municipal Council Trophy 2025 atema 1buba Inter-Ward Football Tournament October 6 nü DDSC Stadium, Dimapur nung tenzükogo.

Iba asayamung ya Dimapur District Veteran Football Association (DDVFA) aser Dimapur Municipal Council (DMC) na longiemer football ajanga telongjem, sportsmanship ajungkettsü aser lokti nem shilem agidaktsü nükjiding nung ayongzüka asayadar. Asayamung lapokba sentong nung Dimapur Deputy Commissioner Dr. Tinojongshi Chang, NCS alakteta jaoker liasü.

Sentong nung o jembiba mapang Dr. Tinojongshi Chang-i, football asaya ajanga ward balala longjemdaktsü atema iba asayamung ayongzüka atema DDVFA aser DMC na nem tenüsang agütsü. Paisa, iba amala sentongtem ajanga lokti tajung yangerba aser sempet aketerkem ajungkettsü atema tongtimbang shilem agiba lemsatepa liasü.

Deputy Commissioner-isa, lanurtem dang district nung inter-ward sports tournament asayaba mapang iba asaya ya telongjem,

discipline aser jurila terenlok atema hadir ka ama amshitsü ayongzüka liasü. DC-i ashiba agi, saisabong yagi ajak longjemdaktsür, aser iba ya tanü lima nung lanurtem terenlok atema kanga tongtimbang kümogo. Pai, asaya nung shilem agiba ajanga teamwork, mental strength, aser physical fitness tajungba kümdaktsür, koba taküm nung takok angutsü atema kanga tongtimbang lir, ta ashi.

Saisabong infrastructure jenjang ajungkettsü atema sorkar bendanga agütsür aliba indang jembiba mapang DC-i, DDSC Stadium ya yakta tajungba kuma yanglushitsü aser iba atema sorkar dangi ken o benogo, ta ashi.

Asayamung nung shilem agirtem ajungshia DC-i parnok dang iba asayamung ya pei nükjiding atongtsü atema maangka ka ama agitsü ajungshia liasü. "Asenoki rangloker minyakra nükjiding metongtettsü. Asenok tekelok aser shitemang ajak anema alitsü nüngdaker," ta pai shisem.

Maneni pai, taruba asayamung nunbo Dimapur kübok ward ajaki shilem agia, iba asayamung ya yimti ajunga telongjem aser

sportsmanship benjungba sentong ka kümdaktsü imlaba lemsatepa liasü.

Sentong nungsa DMC Chairperson Hukheto Yepthomi-i, senso tajung anitettsü atema saisabongi koda tongtimbang shilem agir, iba indang lemsatep. "Saisabong ya meimchir terenlok asoshi tamendakdak ka lir aser nisung taküm melenshitsü aser lokti tashi itshidaktsü tashi lir," ta pai ashi. Mendenbubaisa iba asayamung ya asaya ajungkettsüba atema dang masü saka lanurtem nem parnok sempet sayatsü atema sabang ka agütsü nükjiding nung ayongzüko, ta ashi.

Paisa, football asaya terenlok atema maneni teyari agütsüba atema Dimapur District Veteran Football Association (DDVFA) dang kanga pelaba lemsatep.

Asayamung lapokba sentong ya Yinsem fellowship, DABA Pastor Moalong walling-i sarasademer tenzük aser General Secretary, DDVFA Apa-i lokti pela agizükba o jembia liasü.

Sentong ya Matsung Ozukum aser Sangtila Longchar na lenisüba nung agi aser Dimapur Municipal Council nungi ward 23-i shilem agia liasü.

NSF MM Trophy: Chedema VYO aser Tangkhul KS na QF-i iogo

Kohima, Mongputeni/October 6 (TYO): Indira Gandhi Stadium Kohima nung tang asaya aliba NSF Martyrs' Memorial Trophy nung Hombarnü Chedema Village Youth Organisation (CVYO) aser Tangkhul Katamnao Saklong (TKS) Manipur nati pei tata asaya koka quarter finals-i iogo.

Asayamung nung pre-quarter finals round, kong state aser tanga state nungi team ti ia lir, iba round ya tanü nungi tenzükogo.

Hombarnü mezügbuba asaya nung Chedema VYO-i goal 4-0 agi direct-seeded team, Rever Gangtok Sporting Club kokogo

Asaya nung Chedema VYO atema Lenboilun-i asaya mezügbuba shilem nung minute 39 aser 42buba nung goal ana idaktsü. Asaya tanabuba shilem nung Daniel-i minute 60buba nung tasembuba goal idaktsü aser Zemik-i minute 84buba nung goal pezüba idakja parnoki asaya kokogo.

Iba asaya atema CVYO nungi asayar Robinson nem taoba mapang NSF vice President aser iba asayamung steering committee züngsem Sinhilo Thong-i man of the match naroküm agüja liasü. Iba asaya atema Social Welfare

Department Joint Director Imkongzenla Jamir match patron liasü.

Tanabuba pre-quarter asaya nung taoba mapang champions Tangkhul Students' Union-i goal 3-1 agi Mez & Co kokogo.

TKS atema Chanso-i minute 27buba nung mezügbuba goal idaktsü aser asaya mezügbuba shilem parnok tejakdang sür tembang. Ajisüaka asaya tanabuba shilem nung Mez & Co atema minute 64buba nung Haokhohen-i goal ka idakja kasasa aküm.

Maneni minute 83buba nung Wongshung-i goal ka idakja Tangkhul KS pur tejakdang aküm aser mapang apuloktsür asayaba mapang Samson-i par team atema tasembuba goal idakja parnoki asaya akok.

Asaya atema player of the match naroküm TKS nungi asayar Wungshung nem Technical committee züngsem P. George Vizo-i agütsü aser iba asaya indang Patron ji Regional Transport Officer Kohima Roben Mesen liasü.

Tanü asaya akokba sülen team ana ya October 10 nü quarter final asayatsü.

October 7 nü asayatem:

1. Red Scars vs Michazou @ 12Noon
2. Sechü Zubza FC vs Ward 10 Kohima @2pm.

35+ Mokokchung Football League Season-6 Revenant FC-i benogo



35+ Mokokchung Football League Season-6 champion Revenant FC pur den tayongertem külemi tangokba noksa nung angur. Mokokchung, 5th October 2025

Mokokchung, Mongputeni/October 6 (TYO): 35+ Mokokchung Football League (MFL) Season 6 October 4, 2025 nü Rempukong Astro Turf, Ungma nung asaya-a tembangogo. Taküma iba asayamung marok Revenant FC telokisa benogo. Joko iba asayamung ya Revenant-i trokbenbuba atonga-atonga abener.

Iba league ya 2022 küm "Fitness, Friendship & Fellowship" omen dak rangloker tenzük. Taküm iba asayamung nung - Revenant FC, New

Ecclesia, Wasang FC, Terokroker FC, Trebuchet FC aser Nova SC item team 6-i shilem agia liasü. New Ecclesia pur tanabuba jenjang nung liasü.

Iba league 12th April 2025 nungi tenzük 4th October, 2025 tashi asayaba nung asaya ajak senteper 75 liasü. Asaya shia nisung ka nem 'man of the match' shima senpet (gift hampers) agütsü aser iba senpetji 35+ MFL ayonger nungi züngsem aser Revenant FC kibur, Sentianger-i tenla.

Ano osang tajung kaji 35+

MFL ayongertemisa '35+ MFL Super Cup' ta sür asayamung ka ayongtsü ta metetdaktsüogo aser ibaji tang shilem agir telok trok (6) tsüngta pool ana kuma lemsar asayatsü, aser pool ana rongnung tajungtiba anaji Super Cup atema tokteptsü.

Iba asayamung ya October 11, 2025 nungi tenzüksü aser final match ji November 8, 2025 nü asayatsü aser iba season shibangba den senpet agütsüba sentongji November 9, 2025 nü agitsü, ta tayongertemisa metetdaktsü.

BENDANGLI OSANG : Tapak 7 nungi...

France PM Sébastien Lecornu ita...

Party kari tekeraba nung election aginer aser kari Macron dang tir menden nungi alitsü ashir saka pai 2027 küm pa indang kümsük metembang tashi inyaktsü ta shia arur.

"Tang asoshi shisa kaa inyaktsü ajunga agi elections agitsüba dang lir. Mapang talangka asayamenüa aruogo. France nüburtem laktetogo. Macron-i asen linük tensa kanga majung nung yuja lir," ta hard-right National Rally (RN) nungi Marine Le Pen-i ashi.

Tang mera agitsü asoshi telemtetba agitsü Macron dak keta lir.

Pai ano ato kilonser ka shimtsü akok. Pai ano maneni National Assembly shibangtettsü mesüra pai pa sasa menden nungi alutettsü.

Ajisüaka pai tesüsaba yabo meinyaktsü amai aser mezügbuba mera ya ang

agitsü akok.

Macron asoshi sorkar ka kumtettsü teimla tatembangbaji Lecornu ya liasü, saka paia tamakok ajuru.

Lecornu ya taoba mapang armed forces minister inyaka liasü aser küm ana majungdang France indang ato kilonser pongu buba liasü.

European Parliament vote nung tamakok ajuruba sülen majority tejangja ngutettsü meranga Macron-i 2024 küm July ita anojungi parliamentary electons agiba sülen France yimten kanga tashi mait akum.

Iba elections yagi 'hung parliament' ang kuma telok balala tsüngta kanga mejungi telemsa adoka külemi inyaktsü memulungi akum.

Iba yongji ato kilonser katia bills agizüktsü asoshi nüngdakba teyari monguteti arur.

BILEMDANGANG

"Memerandang ser tamakok anguba dang nungibo merangdang makokba tajungba."